

EKALESIA FAAPOTOPOTOGA KERISIANO I AMERIKA SAMOA
OFISA O A'OA'OGA KERISIANO



VASEGA MATUTUA FAAPITOA

2023

VASEGA: MATUTUA FAAPITOA (2023)

<u>ASO</u>	<u>FAASOLOGA O MATAUPU</u>	<u>ITULAU</u>
1. Fepuari 05, 2023	O le alofa ua taliaina.	1-2
2. Fepuari 12, 2023	O le alofa e galo ai leaga ma tigā.	2-3
3. Fepuari 19, 2023	O le alofa e faatumauina le ola.	3-4
4. Fepuari 26, 2023	Suega mo Fepuari.	4
5. Mati 05, 2023	O fete'ena'iga i tu ma aga masani.	5
6. Mati 12, 2023	Faailogaina feeseeseaiga.	6
7. Mati 19, 2023	Fofoina o manu'a o ananafi.	7
8. Mati 26, 2023	Suega mo Mati.	8
9. Aperila 02, 2023	Ia faaititia le ola faafoliga. (Aso Sa o 'Laupama')	9
10. Aperila 09, 2023	O loto ua gaogao i'i. (Aso Sa o le 'Eseta')	10
11. Aperila 16, 2023	O le valaau ia faamaoni.	11
12. Aperila 23, 2023	Vaai i le Atua ae lē o lou tuāoi.	12
13. Aperila 30, 2023	Suega mo Aperila.	13
14. Me 07, 2023	Ua ia te i tatou ea le Atua pe leai?	14
15. Me 14, 2023	Ua fai Eseta ma 'Masiofo'. (Aso Sa o 'Tinā')	15
16. Me 21, 2023	Faasoia lau ta'utinoga.	16
17. Me 28, 2023	Feliua'iina e le Agaga Paia. (Aso Sa o le 'Penetekoso').	17
18. Iuni 04, 2023	Ua oia le 'Fofoaga'.	18
19. Iuni 11, 2023	Ia tasi i le foa'i, tasi i le taliaina.	19
20. Iuni 18, 2023	Talia ma faafeiloa'i e le tasi le tasi. (Aso Sa o 'Tamā').	20
21. Iuni 26, 2023	Suega mo Iuni.	

MANUIA MALOLOGA O LE AFA-TAUSAGA: IULAI 02, 2022 – IULAI 30, 2022.

Tusía: Segā Siuati Ifopō

MANATU AUTŪ O FEPUARI: “O LE ALOFA E UFIUFI AI MEA UMA”
(Love governs everything).

FEPUARI 05, 2023

MATAUPU 1: “O LE ALOFA UA TALIAINA” (Loving receiving).

TUSI FAITAU: Mataio 26: 6 - 13.

SINI: Ia malamalama le fanau i le alofa fai mea sili e leai sona tuāoi, a e talia ma ta’uleleia e faavavau.

Fesoasoani mo faiaoga: E faa-talofa atu i le amataga o le tausaga aoga fou, mālo le faamalolosi i faiva ma tiute ua valaauina ai i tatou e le Atua. Ua motu atu so outou matūpalapala e ala i le saunoaga a le Faatonu i le ‘Upu tomua’ o lenei galuega; a’o nai faamanatu masani i le tau-amata o vasega o lenei foi tausaga aoga. O mea aoga e tataua ona manatua mai e le fanau mo Aoga Aso Sa i Aso Sa ta’itasi. Ia mautinoa le Tusi Paia, api, peni, sene ma nisi o mea-aoga masani mo le vasega. Ia manino i lau susuga a le faiaoga tulaga o le matutua ua i ai le fanau; o le ‘Vasega Matutua Faapitoa’, ina ia tapena ma saunia faataata i ai au mataupu ma folasaga.

E i ai se manatu tatou so’oso’o tau’au pea mo le manuia o alo ma fanau a le ekalesia. Ia maua le onosa’i, tatou faamoemoe i le Atua e atoatoa ai galuega. O tulaga ma fausaga o mataupu o le tausaga faa-le a’oa’oga, o loo fesuia’i ma le ‘Tusi Faitau Aso’ a le Ekalesia, a e o mataupu ma tala mai le Tusi Paia e faataata i mea o loo tutupu i lo tatou vaitau pei ona ta’ua e le Faatonu.

Tauloto: Mataio 26: 10 & 13; A ua silafia e Iesu, ona faapea atu ai lea o Ia ia te i latou, “Se a le mea ua outou faalavelave ai i le fafine? Auā o le mea lelei ua na faia mo a’u nei.” E moni, ou te fai atu ia te outou, o nu’u uma i le lalolagi e tala’iina atu i ai lenei tala lelei, e ta’ua ai le mea ua faia e lenei fafine, e faamanatu a’i ia te ia.”

Fesoasoani mo le Mataupu: O le tala masani i le fafine na fai mea sili i le Alo o le Atua pei ona molimau le evagelia o Mataio. E ui ina eseese faamaumauga a le au fai-evagelia e uiga i le fai mea lelei o le fafine i le Alo o le Atua, a o loo tutusa le faamamafa o le alofa ua taliaina e le Alii. O loo manino le eseese o vaaiga a ona soo ma le silasila faale-agaga a Iesu i le faatinoga a lenei tinā. O le fafine lē taualoa, ae na manatunatu i se avanoa e faatino ai le alofa fai-measili. Na manatua e le fafine upu taumāvae a Iesu e uiga i ona puapuagā, e o’o atu ina maliu ai. O se avanoa lelei lea e faatino ai le alofa i le faata’imuaina o le tanuga o le Alii e ala i le u’uina i le fagu alapasa ua i ai le suauu manogi tau tele.

O a latou feeseeseaiga na fesili ai Iesu i ona so’o; ‘se a le mea tou te faalavelave ai i le fafine? Auā o le mea lelei ua ia faia mo a’u nei.’ O le alofa ua taliaina ma amanaia e le Alii, ona o faatinoga na totogo a’e mai le loto malie o le tinā. Na faamanuia i ai Iesu; ‘o nuu uma i le lalolagi e tala’iina atu i ai lenei talalelei, e ta’ua ai le mea ua faia e lenei fafine, e faamanatu a’i ia te ia.’ Ioe, e faavavau le alofa ua moni aemaise le fai-measili mo le Alii ma lana galuega. O le alofa fai-measili o le fafine lea ua tatou talanoa ai i lenei taeao.

Upu ma o latou uiga:

- lepela: O le tagata ua i ai le ma’i papala ma ua vavae ese ma mafutaga.
- faamāumau: O se mea ua fai ma otaota po ua māumau ma leai se tāua.
- faata’imuaga: O se faailo e iloa ai o le a tanu se tagata oti.

A’oa’oga:

A’oa’oga:

- ❖ Ia maua’ā le faatuatua i le Talalelei e lē fetosoa’iina ai le loto i mea lē aoga o le olaga.
- ❖ Ia aua le seetia gofie i le mālu o le tai taeao, ae taula i le Atua le loto i taimi uma.
- ❖ O le Atua lava e to’ā i ai le au-peau o le ola, na o Ia e atoatoa ma nanea ai soo se faiva.

Tatalo: Le Atua e, faamanatu mai pea lo matou ola taumafai ina ia tumau pea le talitonu ma le faamaoni i le talalelei ia Iesu Keriso e maua ai le ola faavavau. Amene.

Ia manuia tele tapenaga ma a’oa’oga o lenei Aso Sa.

MANATU TA’ITA’I: “IA TASI MA LOU TAGATA,” (At one with self).

APERILA 16, 2023

MATAUPU 11: “O LE VALAAU IA FAAMAONI,” (The call to be honest).

TUSI FAITAU: EFESO 4: 17 - 32.

SINI: Ia iloa e le fanau o le ola faamaoni ma le amio sa’o e fιαfia i ai le Atua, auā e malosi ai lou talitonu ma le faatuatua i le Talalelei.

Faamanatu mo faiaoga: E leai se isi mea e sili atu nai lo le olaina o le Keriso-manumalō, pei ona fautua Paulo i lana tusi, lea foi ua manumalō a’ia’i ai ma le au-talitonu pei ona inainā atu le aposetolo o nuuese. O le faatuatua faamaoni o le kerisiano o le ola mamalu ma le tausaaфия lava lea aemaise le taliaina o le Talalelei a le Atua. Se’i toe to manatu i le upu ‘faamaoni,’ ioe e ese le faigatā ona maua e se tagata lea tulaga. E lē atoatoa foi i se tagata lenei meaalofa, sei vaganā ua vavālalata lana so’otaga ma le Agaga o le Atua.

Ia faamanino i le fanau le uiga o le ‘valaauina ia faamaoni’ e ui ina faigatā a ua valaauina e fai ma nafa tauave o le tagata talitonu. O lo tatou ala i malo foi lea pei o manatu o le Talalelei, o le amio sa’o ma le tausaaфия e fιαfia i ai le Alii. O le tasi o manatu o laualuga i le mataupu a Paulo, o le faamaoni i mea uma ma taimi uma. Ia tutusa taimi ma tagata uma i lou ola faamaoni.

Tauloto: Efeso 4: 23-24; “Ae peitai, ia toe fuata’iina mana’o o outou loto, ma ia oofu outou i le tagata fou ua faia e foliga i le Atua, i le amiotonu ma le amio lelei e faamaoni.”

Fesoasoani mo le Mataupu: Na finau Paulo i le ola faa-kerisiano i le amataga o le mataupu lea e 4: 1-16; peita’i mai le tusi faitau o lenei taeao o loo faatusatusa ai e le aposetolo le ola kerisiano o Efeso ma le soifua tuai na masani ai le lalolagi. O loo tau faamatala e Paulo le eseesega o le ola i lalo o le mana o le agasala ma le soifua e tali fesaga’i ma le mana ia Keriso Iesu. O le tusi atu lea a Paulo; sei fafagu le au faatuatua i Efeso e tuu ese le agasala ma mea leaga uma o loo punitia ai lo latou ola talitonu i le Talalelei ia Keriso Iesu.

Galuega Faatino: (I au lava upu; ½ laupepa faamatala ai taimi na e iloa ai lou lē faamaoni.)

Ia malamalama i uiga o upu ma igoa o i le Tusi Faitau:

- ✓ loto maa’a: o le loto malō ma le faigatā ona faatonu.

5. O le a le uiga o le tasi foa'i ae tasi e talia? **T:** E faasino i le foa'iina e Keriso Iesu o lona soifua mo le lalolagi; ae ao i tagata uma ona taliaina lona Toe Tu e ala i le faatuatua.
6. O ai na faatusa i ai e Iesu, o e ou le Malo o i le lagi? **T:** Na faatusaina e le Alii i tamaiti, pe afai latou te lē taliaina le Malo o i le lagi pei o se tamaitiiti, e lē sao atu lava i ai.
7. O a ni mea na faia e Iesu i tamaiti? **T:** Ina ua uma ona ia faatu i o latou luma ma fetalai atu e uiga i le Malo o i le lagi; ona ia faae'e lea o ona aao ma faamanuia ia te i latou.'
8. O a mea a le au so'o na fai ina ua aumai tamaiti i le Alii? **T:** Ua latou vavao atu ia te i latou; a ua silafia e Iesu ona ita tele ai lea o le Alii.
9. O le a le faamamafa a Paulo i le mataupu e 15 o Roma? **T:** O loo manino i le tusi lana faamalosia au i Kerisiano o i Roma aemaise ina le ofo alofa o le tasi ma le tasi i le galuega.
10. O le a le ta'utinoga a Paulo o loo i le tusi faitau? **T:** "Ia avea o ia ma auauna a Iesu Keriso i nuu ese, ina ia faia le faiva o le 'Ositaulaga' a le Atua; ma ia talileleia le taulaga o nuu ese, ina ua faapaiaina e le Agaga Paia."
11. O a upu faamalosia a Paulo mo nuu ese? **T:** "O le mea lea ou te ta'uta'ua ai oe i nuu ese, ma ou fiafia e momoli atu le Talalelei i e lē iloa lenei tala fiafia. Auā amuia oe nuu ese ua tunoa le alofa mai le Atua o manuia, ia viia ai pea o Ia e faavavau.. Amene."

Ia manuia tele le faigā-suega o lenei Aso Sa.